

1 THESSALONIANS

Tahi Lede a Paul ang gi di

Nohongo Dabu i Thessalonica

Di haga modongoohia:

Thessalonica la di waahale dagi o Macedonia, tenua e dau gi Rome. Paul gu haga duu dana nohongo dabu i di gowaa deelaa, i muli dono hagatanga i Philippi. Digau o Jew i golo ne hai tamu a Paul i nia hegau a maa ala e kila huoloo i baahi digau tuadimee ala e hiihai e daumaha i baahi digau o Jew. Deelaa di mee digaula ne hagabagi a Paul gi daha mo Thessalonica, gaa hana gi Berea. I muli o mee ne dau i Corinth, mee ga longono nia longo o di nohongo dabu i Thessalonica mai i baahi dono ehoo hai hegau go Timothy.

Tahi lede a Paul ang gi di Nohongo Dabu i Thessalonica la ne hihi belee hagamaaloo aga ge e hai gii donu nia dama a Christ ala i golo. Gei mee guu hai dana danggee i dono longono nia hagadonu digaula mo nadau aaloho. Mee e haga langahia gi digaula tagadilinga mouli dela nogo hai koia i dono madagoaa nogo noho i nadau baahi, gei e helekai gi nia heeu ala ne kila aga ilodo di nohongo dabu i di lua hanimo o Christ, dela bolo tangada hagadonu dela ne made i mua di hanimo o Christ, be mee e dau e kae di mouli dee odi dela e gaamai go Christ i dono hanimo? Gei di heeu i golo bolo Christ e hanimo labelaa ma gaa hee? Paul gu hagi anga gi digaula bolo gi ngalua hua gimua ilodo nadau hegau o di

hagadonu, mo di talitali hagadagadagagee gi di hanimo i Christ.

Di hagahonu di beebaa deenei:

Di haga modongoohia (1.1)

Di danggee mo di hagaamu (1.2—3.13)

Di aago di hai o di mouli o nia dama a Christ (4.1-12)

Di agoago o di hanimo i Christ (4.13—5.11)

Di hagaodi gi muli o nia bule (5.12-22)

Di hagaodi o di lede deenei (5.23-28)

¹ Mai baahi o Paul, Silas mo Timothy, ang gi di nohongo dabu i Thessalonica dela gu hai mee ginai God Tamana mo Tagi go Jesus Christ.*

Tumaalia mo di noho i di aumaalia gi madalia goodou.

Di mouli mo di hagadonu o digau o Thessalonica

² Gimaadou e danggee hagaamu tumaalia ang gi God i nia madagoaa huogodoo, ge dee modu di madau haga langahia labelaa goodou ilodo madau dalodalo. ³ Gimaadou e langahia i mua nnadumada o tadau Damana go God i di godou hai hegau gi godou hagadonu, mo di aloho dela gaa hidi ai goodou ga ngalua damana, mo di godou hagamau dangihi ilodo di godou hagadagadagagee gi tadau Dagi go Jesus Christ.

⁴ Madau duaahina nei, gimaadou gu iloo bolo God e aloho i goodou, gei gu hilihili goodou e hai nia dama ni aana. ⁵ Gimaadou gu hagadele adu gi goodou di Longo Humalia, hagalee go nnelekai la hua, mo nia mogobuna o di Hagataalunga Dabu, mo di madau hagadonu

* **1.1:** Nnegau 17.1

dela guudonu humalia. Goodou gu iloo madau mouli i di madau madagoaa nogo noho i godou baahi belee hagahumalia goodou. ⁶ Goodou gu daudali hua gimaadou mo Tagi. Ma e aha maa goodou guu tale ang gi di hagaduadua damana, gei goodou guu kae nnelekai aalaa, mo di tene mai baahi di Hagataalunga Dabu.* ⁷ Gei goodou guu hai di ada hagamodongoohia ang gi digau hagadonu huogodoo o Macedonia mo Achaia. ⁸ Hagalee go nnelekai di Longo Humalia lahua ala ne agoago go goodou gilodo Macedonia mo Achaia, gei di longo o di godou hagadonu a God guu dele labelaa gi nia gowaa huogodoo. Malaa, gimaadou gu dei madau mee e helekai ai. ⁹ Nia daangada huogodoo gu hagabooboo i di godou hagalaamua gimaadou i di madau lloo adu gi godou baahi, mo di godou huli gi daha mo nia balu god ang gi God, bolo goodou e daumaha hua gi God Mouli dela e donu, ¹⁰ mo di godou talitali di hanimoi o dana Dama madua i di langi. Dana Dama madua go Jesus dela ne haga mouli aga go Mee mai i dono made, gei dela e haga dagaloaha gidaadou gi daha mo di hagawelewele a God dela ga dau mai.

2

Nnegau a Paul i Thessalonica (Nnegau 17.1-9)

¹ Madau duaahina nei, goodou gu iloo di madau lloo adu gi godou baahi guu gila humalia huoloo.
² Gei goodou gu iloo di madau hagahuaidu mo

* **1.6:** Nnegau 17.5-9

haga balumee ilodo Philippi, imua di madau lloo adu gi godou baahi i Thessalonica. Ma e aha maa gimaadou guudau gilodo di hai baahi damana, gei tadau God gu hagamaaloo aga gimaadou bolo gi agoago adu gi goodou di Longo Humalia dela mai dono baahi.* ³ Gei madau agoago adu gi goodou, la hagalee ne gaamai i nia kai tilikai, be di maanadu huaidu, be di halahalau dangada. ⁴ Gei gimaadou e agoago i nia madagoaa huogodoo be di hiihai a God, idimaa, Mee gu dugu mai gi gimaadou gi hagadele di Longo Humalia. Gimaadou hagalee hagamada bolo e haga manawa lamalia nia daangada, gei e haga manawa lamalia a God dela e hagadina tadau hagabaubau. ⁵ Goodou gu iloo humalia bolo gimaadou hagalee neloo adu mo madau helekai halahalau, be gimaadou ne helekai i nia helekai ala e hagammuni di hagagailaa. God go di madau haga dootonu. ⁶ Gimaadou digi hagamada bolo e halahala di madau hagaamu mai baahi digau ala i golo, be mai godou baahi, ⁷ ma e aha maa gimaadou e mee di hai goodou gi heia madau hiihai, idimaa gimaadou la nia dama agoago hagau ni Christ. Gei gimaadou nogo manawa balabala i di madau madagoaa nogo noho i godou baahi, nogo hai gadoo be tinana e benebene ana dama. ⁸ Idimaa i di madau aaloho i goodou, gimaadou gu togomaalia e gowadu gi goodou di Longo Humalia mai baahi o God, gei hagalee go di Longo Humalia la hua, mo madau mouli labelaa, idimaa, goodou guu hai nia hoo

* **2.2:** Nnegau 16.19-24; 17.1-9

hagaaloho ni gimaadou. ⁹ Madau duaahina nei, goodou e langahia di madau ngalua duadua. Gimaadou nogo ngalua boo mo aa bolo gi aadee gimaadou, i di madau hagi adu di Longo Humalia mai baahi o God.

¹⁰ Madau gau hagadootonu la go goodou mo God, bolo madau hangaahai adu gi goodou ala gu hagadonu, la nogo madammaa ge donu, hagalee hala. ¹¹ Goodou e iloo bolo di madau benebene tangada nei mo tangada nei i goodou, le e hai be nia maadua e benebene nau dama donu. ¹² Gimaadou gu hagamaaloo aga goodou ge e haga tenetene goodou, gu hagamahi adu gi goodou bolo gimouli i di mouli dela e manawa tene ginai a God, dela e gahigahi mai goodou gi hai mee goodou gi dono henua mo ono madamada.

¹³ Tadinga labelaa i golo dela e danggee ai gimaadou gi God i nia madagoaa huogodoo. Di madau madagoaa ne gowadu gi goodou nia helekai a God, gei goodou gu longono guukae nia maa, hagalee ne kae bolo nia helekai mai baahi nia daangada, gei ne kae bolo nia helekai mai baahi o God, gei di maa e donu. Idimaa, God le e hai hegau i baahi goodou ala gu hagadonu. ¹⁴ Madau duaahina nei, nia mee ala ne hai adu gi goodou, la guu hai labelaa gi nia nohongo dabu a God ala ilodo Judea, gi nia daangada ala gu hai mee ginai Jesus Christ. Goodou guukae di hagaduadua mai baahi godou daangada donu, dela ne kae go digaula mai baahi digau o Jew. * ¹⁵ Aalaa go ginaadou ala ne daaligi

* **2.14:** Nnegau 17.5

Tagi Jesus mo nia soukohp, guu hai hagahuaidu gimaadou. Digaula gu haha manawa gee huoloo a God, mo di hai baahi gi nia daangada huogodoo!*

¹⁶ Digaula gu hagamada e bule gimaadou gi hudee agoago gi digau tuadimee i nnelekai ala e mee di haha mouli digaula. Deenei tamanaiee o nadau huaidu ala nogo haihai i nia madagoaa huogodoo. Dolomeenei gei di hagawelewele o God la guu dau i digaula!

Di hiihai o Paul bolo e haha heetugi labelaa gi digaula

¹⁷ Madau duaahina nei, gimaadou nogo mogowaa i goodou i di madagoaa bodobodo, hagalee mogowaa i baahi tadau hagamamaanadu, gei e mogowaa hua i tadau huaidina. Gimaadou gu hidihidi huoloo i goodou, gu hagamahi belee haha heetugi adu gi goodou!

¹⁸ Gimaadou gu hiihai elloo adu labelaa. Au go Paul gu hagamada belee hanadu labelaa gi godou baahi hagalee hagadahi hua, gei Setan digi diagia gimaadou gilloo adu. ¹⁹ Go goodou hua go di madau hagadagagagee mo di madau tene, mo di madau hadinga e hagaamu ai madau aali i mua tadau Dagi go Jesus i dono madagoaa ma ga hanimoai ai. ²⁰ E donu, ma go goodou ala go madau hagaamu mo madau tene!

3

¹ Gimaadou gu deemee di hagakono di noho mogowaa i goodou, gei gimaadou ga hagamaanadu bolo gimaadou gaa noho hua

* **2.15:** Nnegau 9.23,29; 13.45,50; 14.2,5,19; 17.5,13; 18.12

mada gimaadou i Athens* ² i di madagoaa gimaadou ne hagau adu tadau duaahina go Timothy dela nogo hai hegau dalia gimaadou gi God e agoago di Longo Humalia di hai o Christ. Gimaadou ne hagau adu a mee belee hagamaaloo aga goodou, ge e hagamaamaa godou hagadonu, ³ bolo tangada e dah i goodou gi dee huli gi muli idimaa go nia hagaduadua aanei. Goodou gu iloo hua bolo nia hagaduadua aanei la di mee ni God mai gi gidaadou. ⁴ Di madau madagoaa nogo i godou baahi, gimaadou gu hagi adu i mua di madagoaa bolo gidaadou gaa tale ginia hagaduadua, gei goodou gu modongoohia bolo guu hai. ⁵ Deelaa tadinga dagu hagau adu Timothy. Au gu deemee di talitali, ga hagau adu laa a mee, bolo gi iloo eau di godou hagadonu. E deemee di hai bolo Setan gu hagamada goodou, gei madau hegau ala nogo hai i godou baahi, la gu balumee hua.

⁶ Dolomeenei, gei Timothy gu gaamai di longo haga tenetene o godou hagadonu mo aaloho. Mee gu helekai bolo goodou e mamaanadu huoloo i gimaadou, gei goodou e hiihai huoloo bolo goodou e heetugi mai gi gimaadou, gadoo be di madau hiihai.* ⁷ Malaa, madau duaahina nei, ilodo madau haingadaa mo madau hagaduadua huogodoo, gimaadou e maaloo huoloo, idimaa, ma go godou hagadonu ne hagamaaloo aga gimaadou. ⁸ Dolomeenei gimaadou e mouli, idimaa goodou e hagamaudanghi godou mouli buni anga gi tadau Dagi. ⁹ Dolomeenei gimaadou

* **3.1:** Nnegau 17.15 * **3.6:** Nnegau 18.5

guu mee di danggee ang gi God i goodou. Gimaadou e danggee gi Mee, idimaa gimaadou gu tenetene imua o God, idimaa go goodou. ¹⁰ Boo mo aa, gei gimaadou e dangidangi ang gi Mee gi dugu mai tadau madagoaa e heetugi, gei e hagamaamaa goodou inia mee ala e dee dohu i godou hagadonu.

¹¹ Tadau Damana go God mo tadau Dagi go Jesus gi hagatogomaalia ina di ala dela elloo adu ai gimaadou gi goodou! ¹² Tagi gi hagatomo aga ina di godou aloho i godou mehangga gi honutulu be madau aloho i goodou. ¹³ Idi ala deenei, Mee ga hagamaaloo aga godou manawa gii dohu dogomaalia ge e dabuaahia ibaahi tadau Damana go God, i di madagoaa tadau Dagi Jesus ma ga hanimoj mo ana daangada huogodoo.

4

Di mouli e tene ginai God

¹ Madau duaahina nei, goodou gu iloo mai madau baahi di mouli dela e haga tenetene ai a God. Edonu, deenei di godou mouli e mouli ai, gei dolomeenei gimaadou e tangi adu hagamahi idi ingoo o tadau Dagi go Jesus, bolo goodou gi heia hua beelaa gitomo aga ilodo di mouli deenei. ² Goodou gu iloo nia agoago ala gu hagi adu go gimaadou mai di mogobuna o tadau Dagi go Jesus. ³ Malaa, deenei di manawa o God adu gi goodou, bolo gi heia goodou gii dabu, gei gilawa mai gi daha mo di hai be di manu. ⁴ Tangada nei mo tangada nei gi iloo ia di noho ibaahi dono lodo i tabuaahia mo di hagalaamua.

⁵ Hudee hiihai gi di manawa hai be di manu, gadoo be nia daangada ala e noho ilodo di bouli ala e de iloo ginaadou a God. ⁶ Malaa, di mee deenei, gi dee hai hala go tangada gi dono duaahina daumaha, be e hagahuaidu nia donu o maa. Gimaadou gu hagi adu nia mee aanei i mua, gei gimaadou gu haga modongoohia adu gi goodou di hai a God dela e hagaduadua digau ala e hai nadau mee hala beenei. ⁷ God hagalee ne gahigahi mai gidaadou gi lodo di mouli milimilia, gei ne gahigahi mai gi lodo di mouli dabuaahia. ⁸ Maa tangada ga haga balumee nia agoago aanei, la hagalee ne haga balumee tangada, ne haga balumee hua a God dela ne gowadu gi goodou dana Hagataalunga Dabu.

⁹ Au hagalee bolo e hai loo gi hihi adu gi goodou di godou hai dela e aloho i godou duaahina hagadonu aalaa, idimaa, God guu lawa dana hagi adu di hai o di hagadau aaloho i godou mehanga. ¹⁰ Goodou guu hai nia mee aanei gi godou duaahina ala ilodo Macedonia hagatau. Malaa, madau duaahina nei, gimaadou e tangi adu bolo gi hagamahi gi haga damana ina aga di aloho deenei. ¹¹ Goodou hagamahi gi di mouli dela e noho i di aumaalia giibida madamada humalia i goodou. Gi ngalua gi godou mouli, be di madau hai ne hagi adu i mua. ¹² Goodou ma gaa hai beenei, gei goodou ga hagalaamua go digau ala e de hagadonu, gei goodou ga hagalee gana gi digau ala i golo.

Di hanimo i Tagi

13 Madau duaahina nei, gimaadou e hiihai bolo goodou giloo di tonu di hai o digau mmade, bolo gi de lodo huaidu goodou gadoo be digau ala nadau hagadagadagagee ai. **14** Gidaadou gu hagadonu bolo Jesus guu made, gu mouli aga, malaa, gidaadou gu hagadonu bolo God galaha mai dalia a Jesus digau ala guu mmade ilodo nadau hagadonu a Mee.

15 Malaa, aanei nia agoago a Tagi ala e agoago go gimaadou adu gi goodou bolo gidaadou ala emouli idi laangi o Tagi ma ga hanimoai ai, gidaadou hagalee bolo gaa hula i mua digau ala guu mmade.* **16** Tagi ga haneia idi langi, gei di lee hagadaba gaa hai, deenei di lee o tangada dilangi aamua, mo di lee odi buu a God gaili, gei digau ala ne mmade ilodo nadau hagadonu a Christ ga mouli aga matagidagi. **17** Nomuli, gei gidaadou huogodoo ala emouli idi madagoaa deelaa, ga haga puni gi digaula ilodo nia gololangi e heetugi gi Tagi ilodo di ahiaalangi. Deelaa di hai o tadau noho madalia a Tagi gaa hana hua beelaa. **18** Malaa, hagadau hagamaaloo aga ina goodou gi nnelekai aanei.

5

Hagatogomaalia gi di hanimoio Tagi

1 Madau duaahina nei, nia madagoaa mo nia laangi nia mee aanei ma ga kila aga e hagalee e hai loo gi hihi adu gi goodou. **2** Idimaa, goodou gu iloo humalia di Laangi o Tagi dela e hanimoai ai le e hai be tangada gaiaa dela e hanimoai idi

* **4.15:** 1 Corinthians 15.51-52

boo.* ³ Deelaa di madagoaa nia daangada ga helekai boloo, "Nia mee huogodoo gu humalia, guu noho baba," gei dela hogi di madagoaa di mooho damana ga limalima gaa tale ang gi digaula, gadoo be di mmae o di ahina ma ga haanau, gei nia daangada huogodoo ga deemee dillele gi daha. ⁴ Madau duaahina, goodou hagalee e noho ilodo di bouli, malaa, di laangi deelaa gi hudee haga homouli ina goodou be tangada gaiia. ⁵ Goodou huogodoo la nia daangada ni di maalama, nia daangada ni di aa. Gidaadou hagalee ni di boo be ni di bouli. ⁶ Malaa, gidaadou hudee kii be digau ala i golo, giaala, gi madammaa. ⁷ Digau ala ekii, le ekii i di boo, gei digau ala elibaliba, le elibaliba i di boo. ⁸ Malaa, gidaadou la nia daangada ni di laangi, gidaadou gi madammaa, gi ulu di hagadonu mo di aloho, ehai tuuli o tadau hadahada, gi ulu di goobaidauwa, dela go di hagadagagee o di mouli dee odi.* ⁹ God hagalee ne hilihili gidaadou bolo gi duadua i dono hagawelewele, gei gi hai mee gi di mouli dee odi mai i tadau Dagi go Jesus Christ, ¹⁰ dela ne made mai gi gidaadou bolo gi mouli gidaadou dalia a Mee, ma eaha maa gidaadou e mouli be emmade i dono madagoaa ma ga hanimoai ai. ¹¹ Deenei laa, goodou hagadau hagamaaloo ina aga goodou, hagadau hagamaamaa i goodou be di godou hai dela ehai dolomeenei.

Nia aago mono hagaaloho haga muliagina

* **5.2:** Matthew 24.43; Luke 12.39; 2 Peter 3.10 * **5.8:** Isaiah 59.17; Ephesians 6.13-17

¹² Madau duaahina nei, gimaadou e tangi adu gi hagalabagau ina digau ala e hai nadau hegau i godou baahi, ala e dagi ge aago goodou gi di mouli o Christ. ¹³ Gi hagalaamua ina, aaloho i digaula, idimaa go nadau hegau ala e hai. Goodou gi noho i lodo di aumaalia.

¹⁴ Madau duaahina nei, gimaadou e helekai hagamahi adu gi goodou, gi hagailoo gi digau ala e hagatoo, gei gi hagamaaloo aga ina digau ala e lligi nadau hagadonu, mo di hagamaamaa digau ala e paagege, mo di hagakono di manawa ang gi nia daangada huogodoo. ¹⁵ Goodou mmada gi humalia gi dee hui di huaidu gi di huaidu, gei nia madagoaa huogodoo goodou gi dugu anga gi heia nia mee humalia i godou mehanga mo i baahi nia daangada huogodoo.

¹⁶ Goodou gi tenetene inia madagoaa huogodoo, ¹⁷ gii hai dalodaloo inia madagoaa huogodoo. ¹⁸ Goodou gi danggee ang gi God inia mee huogodoo, deenei di mee a God e haa manawa ai bolo goodou gi heia i lodo godou mouli buni anga gi Jesus Christ.

¹⁹ Goodou hudee dugua di moomee o di Hagaatalunga Dabu dela i godou baahi, ²⁰ gei goodou hudee haga balumee ina nia helekai mai baahi o God. ²¹ Hagadina ina nia mee huogodoo, daahia go nia mee ala e humalia, ²² gei gi hagapaa gi daha mo nia mee huaidu huogodoo.

²³ God dela ne gaamai gi gidaadou di aumaalia, gi heia goodou gi dabuaahia inia ala huogodoo, ge gi benebene ina goodou hagatau, godou hagaatalunga, godou mouli, mo godou huaidina, gi daha mo nia mee haihala

huogodoo i di madagoaa o tadau Dagi Jesus Christ ma ga hanimoi. ²⁴ Mee dela e gahigahi goodou, ga haga gila aga di mee deenei, idimaa, Mee e manawa dahi.

²⁵ Madau duaahina nei, goodou dalodalo i gimaadou.

²⁶ Goodou gi hagaaloho gi digau hagadonu huogodoo gi di hagaaloho o nia dama a Christ.

²⁷ Au e hagamaaloo goodou i di mogobuna o Tagi bolo goodou gi daulia di lede deenei gi tadau duaahina daumaha huogodoo.

²⁸ Tumaalia o tadau Dagi go Jesus Christ gi madalia goodou.

Beebaa Dabu

The Holy Bible in the Kapingamarangi language of the Federated States of Micronesia, spoken on the Kapingamarangi and Ponape islands, Caroline Islands

Copyright © 1996, 2014 The Kapingamarangi Bible translation committee

Language: Kapingamarangi

Translation by: The Kapingamarangi Bible translation committee

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2015-04-24

PDF generated using Haiola and XeLaTeX on 11 Nov 2022 from source files
dated 7 Jun 2022

28201f3a-53b9-559a-9b49-00a6f40bcb2a